

10 Ä WÄCHSU, Ä SCHWEUE



Eine Geschichte von Achim Parterre

Aller Anfang sig schwär un es sig no ke Meischer vom Himu gheit u är söu guet ufpassse, der erscht Tag sig di haubi Mieti, het der Lehrmeischer gseit, wo der Ueli sini Lehr bir Fäudma z Lyss aagfange het. Är söu em doch hurti es Schregband am Sparen azeichne, het der Lehrmeischer zum Ueli gseit, u de söu er em bissoguet der Chöttistemper bringe, der Stäcbütu u ds Chlopfhouz u ds Riisszüg u d Gsteusagi, ds Stemmise u d Bundaxt. Es isch der erscht Tag vom erschte Lehrjahr gsi u der Ueli isch zimlech ratlos ir Gägend umegstange. Är sou bir Sach si, zuelose, nachefrage, leere, het der Lehrmeischer gseit, vo nüt chunnt nüt u si gönge vor em Znüni no zäme uf e Dachstueu, uf d Sparelaag, de gsäch er einisch e schöne Bruschtzapfen, e subere Schifterschnitt. U är söu mau da häre cho, het der Lehrmeischer gseit, das sig en Ortgang u das sig e Flugpfätte. E Wächsu, e Schweue, e Sträbe e Bueg. E Rigu, en Abbund, e Grat. E Schweuechranz, e Pfättechranz.

Der Ueli het zuegluegt, der Ueli het ume gluegt, der Ueli het uf d Uhr gluegt.

Du muesch zur Troufi luege, Bueb, zur Troufi, nid zur Firscht, het der Lehrmeischer gseit, zur Abgrätig am Gratspare. Hie! Nid da! Nei dört! Das wott aues glehrt si, Bueb, die, Chlaue, Zäpfe, Kämm. Är söu sech die Sache merke, süsch wärd us ihm nie e Zimmermaa. So hopp itz, hü itz, ufschnüere, agrate, Mass näh, bing, chlammere. Wo hesch dis Wärchzüg, gang hou dis Wärchzüg, chasch doch nid ohni Wärchzüg! Chli hü, chli marsch, chli gib ihm, gang hou dini Sänkuschnuer, di Riissbode, dini Gratlehr. Dis Striichmääss, dis Winkuise, di Grundhobu, Handhobu, Roubank. Nid lauere, het der Lehrmeischer gseit, e Zimmermaa muess parat si, muess mit Schweue u Obhouz über e Firscht chönne. Zapfeloch u Chlauebueg mache. Büguzapfe, Scheerzapfe, Blattzapfe aschlaa! Schwaubeschwanz u Fingerzingkig. Gehrig, Stoss u Überblattig. Stäg u Keil, Nuet u Fädere. Bieli, Fuchsschwanz, Süülebohrer. U öb är ihm no zuelosi, het der Lehrmeischer gfragt. Öb der Ueli ihm überhopt no zuelosi?

Buechhändler, het der Ueli dänkt, zmits i dene Spare, Bohle, Pfätten in. Buechhändler. Ja – är hätt haut vilech doch uf e Bruefsberater söue lose.